

Date – 10/1/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Nikum 2025 chhung khan Mizoramah TB vei mi 2,275 hmuhchhuah niin, TB vei muhchhuah zingah hian HIV leh TB vei kawp mi 267 an tel.
2. Mizoram Police-te chuan kum liamta January atanga October thla thleng khan BNS 2023 hnuaiah thubuai 2,039 an ziaklut a, rûkrûk leh inrawkna thubuai a tam ber.
3. Prime Minister Narendra Modia chuan chuan Somnath Temple-a Somnath Swabhiman Parv a hmanpui dawn.
4. Parikhsa Pe Charcha chuan Guinness World Record a lo siam tawh inziaklut zat vaibelchhe 3.50 chu khumin kuminah inziaklut vaibelchhe 4 an tling tawh.

<><><>

TB STATS

Nikum 2025 chhung khan Mizoramah TB vei mi 2,275 hmuhchhuah niin, TB vei hmuhchhuah zingah hian HIV leh TB vei kawp mi 267 an tel.

National Health Mission Mizoram hnuaia National TB Elimination Programme hotute hnen atanga Akashvani News Aizawl thudawn danin, nikum 2025 chhunga Mizorama Ngawr (TB) vei mi 2,275 hmuhchhuah zinga mi 2,134 hi kum 14 chunglam an ni a, kum 14 hnuaialam mi 141 an awm bawk a ni.

TB vei hmuhchhuah tharte hi sawrkar hmun atanga hmuhchhuah 1,900 leh private hmun atanga hmuhchhuah 375 an ni a; TB leh HIV vei kawp mi 267 hmuhchhuah niin, TB vei zinga a bika enkawl ngai MDR-TB vei mi 146 hmuhchhuah thar an awm. Nikum chhunga TB vei hmuhchhuahte hi mipa 1364 leh hmeichhua 911 an ni.

Health Department hnuaia district then danin, nikum chhung khan Aizawl district ah TB vei mi 1569 hmuhchhuah niin an tam ber a, Lunglei district ah mi 155, Siaha district ah mi 123, Champhai district ah mi 71, Kolasib district ah mi 138, Serchhip district ah mi 52, Lawngtlai district ah mi 123 leh Mamit district ah mi 44 hmuhchhuah an ni bawk.

Nikum chhung vek khan TB vanga thi report mi 145 leh TB vei enkawl dam report za zela 84 a awm a; heng TB vanga rthi leh enkawl dam report bik hi chu nikum hmasa 2024 chhunga enkawl dam leh thi zat report nikuma lakkhawm an nih

thu leh nikuma TB vanga thi leh enkawl dam zat hi chu nakkum report-ah a lan dawn thu National TB Elimination Programme hotute chuan an sawi a ni.

<><><>

GST

Mizoram sawrkara Taxation department chuan sawrkar kum kal mekah kum kalta 2025 April thla atanga December thla thleng khan chhiah cheng vbc 941 nuai 13 an hmu a; chhiah hmuh tam berna Goods & Services Tax (GST) atangin cheng vbc 689 leh nuai 55 hmuh a ni.

Taxation department chhinchhiah danin, sawrkar kum kal mek 2025-26 ah hian kum kalta April - December thla, thla 9 chhung khan kau hrang hrang atangin sawrkarin chhiah cheng vbc 941 leh nuai 13 an hmu a; sawrkar sum kum kal meka chhiah hmuh zat hian sawrkar sum kum liamtaa chhiah hmuh zat chu cheng vbc 208 leh nuai 68-in ala pha lo a, hetihruah hian sawrkar sum kum kal mekah hian thla 3 ala awm a ni.

Sawrkar sum kum kal meka chhiah hmuh tam berna GST atangin cheng vbc 689 nuai 55 hmuh a ni tawh a; sales tax atanga hmuh cheng vbc 170 nuai 84-in a dawt a, profession tax atangin cheng vbc 13 nuai 81, entertainment tax atangin Rs 50,000 leh chhiah hmuhna dang atangin Rs 93,160 hmuh a ni.

Mizoram sawrkarin petrol leh diesel atanga chhiah a lakna Road Maintenance Cess leh Social Infrastructure & Services Cess atangin kum liamta April - December 2025 chhung khan cheng vbc 33 point 43 ve ve hmuh a ni bawk.

<><><>

POLICE RECORD

Mizoram Police-te chuan kum liamta January atanga October thla thleng khan BNS 2023 hnuaiah thubuui 2,039 an ziaklut a; kum 2021 atanga chhiarin nikum October thla thleng khan Mizoram Police hian BNS/IPC hnuaiah thubuui 13,188 an ziaklut tawh a; rûkrûk leh inrawkna thubuui a tam ber.

Nikum January - October thla 10 chhung khan Mizoram Police hian BNS 2023 hnuaiah thubuui 2,039 an ziaak lut a, thubuui an ziah luh zingah hian mi rawk thubuui 914 awmin a tam ber a ni.

Mizoram Police-in nikum chhunga BNS 2023 hnuaia thubuui an ziah luh tawh zat an tarlan chinah hian rûkrûk thubuui 614 awm bawkin, mi kutthlak thubuui 73-te, tualthah thubuui 17 te, pawngsual thubuui 26 leh inbumna thubuui 53-te chu a langzar zual an ni.

Kum 2021 atanga chhiara nikum October thla (kum 4 leh thla 10) chhung khan Mizoram Police-te hian BNS (tunhma chuan IPC) hnuaiah thubuui 13,118 an ziaklut a; heng zinga thubuui 5,166 hi rûkrûk thubuui niin a tam ber a, thubuui ziah luh zawng zawng atangin za zela 39 point 38 a tling. Rûkrûk thubuui hi mi rawk thubuui 4,773-in dawtin, inbumna thubuui 640 leh mi kutthlak thubuui 444-te chu a tam zual an ni bawk.

Kum 4 leh thla 10 chhung vek hian Mizoram Police-te hian tualthah thubuai 121, pawngsual thubuai 112, tualthah tumna thubuai 84 leh pawisa lem kaihnawih thubuai 20 ziaklutin, heng thubuaite hi a langsar zual an ni.

VOICE CAST - *Nikum 2025 January atanga October thla chhung vek khan Mizoram Police-te hian Special & Local Law hnuaiah thubuai 709 an ziaklut bawk a; chungte chu ruihhlo kaihnawih (ND&PS Act) hnuaiah thubuai 267 ziahluh niin a tam ber a; naupang chunga hleilenna kaihnawih (POCSO Act) hnuaiah thubuai 126 ziahluhin dawtin, zu khapna dan (MLP Act) hnuaiah thubuai 183, ralthuam kaihnawih (Arms Act) hnuaiah thubuai 31, puakthei thil dang kaihnawih (Explosive Substances Act) hnuaiah thubuai 27, Information & Technology Act hnuaiah thubuai 7 ziahluh a nih bakah hian Special & Local Law kaihnawih thubuai dang 68 an ziaklut bawk a ni. Special & Local Law hnuaiah hian kum 2024 January - October thla chhung vek khan thubuai 736 ziahluh a ni a; nikum thla 10 chhunga thubuai ziahluh aiin kum hmasa thla 10 chhunga thubuai ziahluh zat hi 27-in a tlem zawk a ni)*

<><><>

MISSIONARY DAY

Naktuk Patahianni January Ni 11 hi Mizorama chanchin tha lo thlen Ni, Missionary Day a ni a. Baptist Church of Mizoram chuan a lawm nan a ruai vawiin khan theh in Kohhran ho ten Pathian fakin hun an hmang.

BCM hian Pu Buanga leh Sap Upa ten Mizoram a chanchin tha puanga Mizoram Leilung an rawn rahna hmasa ber hi urhsun tak in an lawm thin a, Kohhran Ni pawimawhah an dah a ni.

Hetihlai hian tuntumah chuan BCM hnuaia tualchhung Kohhran engemawzah chuan sum leh paiah harsatna nei a an inhriat avang a ruaitheh lo te pawh an awm a. A tlangpui a hriat danin Lunglei khawpui chhunga BCM Kohhran 13 vel chuan ruai thehin Missionary Day hi an lawm a, Kohhran 12 vel chuan ruai an theh lova, naktuk Pathiannah thingpui ruai siam an tum thung a ni.

<><><>

HLAKUNGPUI MUAL

Mizo thu ziak mi leh hla phuah thiam thlanchhuah bikte hriatrengna lungphun Hlakungpui Mual chu kum kalta 2025 chhung khan mi 6,915-in an tlawh a; kumin April thla khian Hla Kungpui Mualah hian Mizo thu ziak mi 4 leh hla phuah thiam mi 2 sengluh belh an ni dawn.

Kan corr report lo ngaithla ang.

VC

Champhai District chhung Khawbung khuaa Hla Kungpui Mual hi kum 1986 khan Mizo hlahphuah thiam Patea leh Damhauva te hriatrengna lung phun a bultan niin, kum 10 dan zelah thu leh hla lama thawhhlawk boral tawh zinga thlan chhuah bikte chu a ni bi kima an thih ni atanga kum 5 tling chinte sengluh thin an ni.

Tunah hian Hla Kungpui Mualah hian thu ziak mi 15 leh hla phuah thiam mi 21 hriatrengna lung phun a ni tawh a; kumin April ni 8 leh ni 9 khian Mizo zinga thu

ziak mi pali - Capt. LZ Sailo, Rev. Zairema, Khawlkungi leh Lalhmingliana Saiawi bakah hla phuah thiam pahnih - Hrawva leh Lalmama te chu Hla Kungpui Mualah hian seng luh an ni dawn.

Hla Kungpui Mual hi puitling tan luh man Rs. 20 a ni a; kum kalta 2025 chhung khan Hla Kungpui Mual hian tlawhtu mi 6,915 neiin, an zinga mi 11 hi ramdang mi (foreigner) an ni a, India ram state dang mi 16 an awm bawk.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

PM

Prime Minister Narendra Modia chuan zaninha nit hum cham turin Gujarat a thleng dawn a. A cham chhungin Somnath Temple-a Somnath Swabhiman Parv a hmanpui ang.

Somnath Swabhiman Parv hi ni li chhung hman niin Ningani khan ropui taka hawn a ni a. Somnath Temple in vawi tam tak beih anih hnuah pawh kum 1000 chuang a din chhonzawm theih avangin lawman hun hi buatsaih a ni a. Kum 1026 khan Somnath Temple hi Mahmud Ghazni chuan a bei a. Hemi hnu hian vawi engemawzat beih a tawk a. Kum 1951 khan thawm that niin kumin hi thawmthat anih hnu a kum 75 a tlinna chiaah a ni bawk.

<><><>

PPC

Prime Minister Narednra Modia'n zirlaite nena hun a hmanna programme Parikhsa Pe Charcha chuan Guinness World Record a lo siam tawh inziaklut zat vaibelchhe 3.50 chu khumin kuminah inziaklut vaibelchhe 4 an tling tawh. Union Education Minister Dharmendra Pradhan chuan Parikhsa Pe Charcha chu nasa takin a thang tih sawiin rampumah thalaite tan rilru hahna awm lova zirna siam duhna thlipui a tleh tir mek a ti a. Union Minister chuan Exam Warrior zawng zawngte chu Parikhsa Pe Charcha ah hian tel vek turin a sawm bawk a ni.

<><><>